

祠規九則

一祠宇乃祖宗寢室務期嚴肅潔靜毋敢褻瀆頭門宜常關鎖非祭期不准擅開祠內各處不許堆積柴薪什物寄宿閑雜人等致壞祠宇每年修理檢蓋均係總管值年動用公項惟須註簿核算以杜侵蝕

一墳墓乃祖先藏形之所子孫命脈攸關我族祖塋星羅碁佈世遠年湮子孫豈能盡悉惟現在確實者每年掛掃不得畏難就近舍遠倘被外姓侵犯須理論年久崩塌當修培該總管值年傳族動公不得論房分彼此致啟參商此最要着慎

勿輕視

一祀田所以供粢盛林木所以庇祠宇總管值年當擇有力者承佃耕種田不得荒蕪租不得抗欠山中竹木不得擅砍祇准刪除脚柴庶祀典日隆而祠宇益形其美觀矣

一祭祀務期嚴肅以昭誠敬如有不正衣冠者不准與祭主祭嗣孫舉族中派尊望重者各挨班跪拜赴飲福酒照序分坐毋得擁擠喧嘩祭畢選才學兼優者捧讀訓約族人須靜心聽受歸各語其子弟庶於修身齊家之要不無少補云

一每年清明掃墓定期三月初十並不行傳各處族人或一二

名屆期先夕赴祠次日一同掃墓由祠中備辦隨時飯菜不辦酒席所有掃墓鞭爆祭儀墓錢均係值年先期備辦族人不必攜帶至瀏邑胥箕坡道吾山掃墓每年輪派二人往返用費公出亦宜簡用爲是

一每逢子午祭祀定期九月十五並不行傳各處族人屆期踴躍攜帶行李整齊衣冠赴祠以昭肅敬到祠時先赴行李所交收行李註名貼揮隨赴號房報名某縣某祠某名掛號交清席費 席費數目由總祠中臨時酌定牌示 領揮登席早晚啜食兩餐飯後繳揮銷號不得違議

一重修譜議鐫刷百六十冊每冊編定字號將領譜某祠某房某名俱載其中以便稽查領歸收藏須加珍重毋許借與異姓翻閱亦不許私自添註塗改每逢子午年祭期各房與祭人務須攜譜入祠驗勘如有油污損壞或捏故不帶來祠者
公同議罰

一祠中事務不必分房輪管但須族眾公舉附近族人管理其才具明幹公正老成者爲總管勤慎明白者爲值年總管掌管鎖鑰總簿收存契據值年經理錢穀佃田收租退莊修理祠宇製備器皿什物照管山場柴薪竹木至清明祭掃修培

墳墓及子午年大祭亦均係值年承辦但值年經手費用必先與總管商酌既用之後隨註草簿交總管彙入總簿俟大祭三日後將逐年出入帳目憑族眾至祠算明請同結帳族人經手登簿值年不准挪借總管亦不得侵蝕如果勤慎斟酌管公者獎賞留用其不善理公事者將簿據鎖鑰錢穀等項憑眾交出聽族另舉

一每逢祭祀族中子姪咸集務須尊卑有別長幼有序倘有嗜酒任性目無尊長該族正房長照規責懲如敢逞刁卽行革出嗣後不准入祠祭祀

以上各條均揀總祠中最緊要者嚴立規程以垂久遠其餘
法戒之嚴勸懲之善散見於訓約篇中并各支祠譜具有明
文者概不贅入